

河津縣志卷之十一

藝文一

漢

司馬遷贊

班固

自書契之作而有史官其載籍博矣故遷據左氏國語
采世本戰國策述楚漢春秋接其後事迄於大漢貫穿
經傳馳騁古今上下數千載間斯以勤矣然劉向楊雄
皆稱遷有良史才服其善叙事理辯而不華實而不俚
其文直其事核不虛美不隱惡故謂之實錄嗚呼以遷
博物洽聞而不能以智自全迹其所自傷悼小雅巷伯

之倫夫惟大雅旣明且哲以保其身難矣哉

唐

唐高宗勞薛仁貴勅

金山大陣兇黨實繁卿身先士卒奮不顧命左衝右擊所向無前諸軍賈勇致斯尅捷宜善建功業全此令名也

唐元宗授薛訥右羽林軍大將軍制

出師禦寇功成於告捷振旅休兵禮備於行賞具官薛訥勲閥良將邦家老臣讀太公之立言受穰苴之爲法德業中邃牆仞罕窺智謀宏遠泉源不竭須佇公孫之

績頗蠲孟明之罪遂能長驅隴上深入湟中殲厥羌戎
殘其蠱毒野無遺孽朝有茂勲宜應設壇之寵俾光期
門之寄可右羽林大將軍上柱國河東郡開國公

與陳叔達重借隋紀書

王績

久承所撰隋紀繕寫咸畢前舍弟及家人往並有書借
咸不見付豈連城之珍俟楚文而乃進崩山之操待鍾
期而後發應以左貂右蟬榮冠東省掌壺負璽望重南
宮朝夕丹墀揖讓增價往來青瑣步頓生光豐屋華棖
顧蓬蒿而徒眷鳴鐘列鼎想藜藿而移交不與驕期遂
忘曩時之好耳僕遭逢明聖棲遲邱壑幸悅堯舜之風

得全箕穎之操雖心期所托吾道遙存而出處離異儀
形難接所以願憑鱗羽宛若承顏望觀述作欣然得意
足下裁成國典褒貶人倫欲使明鏡一時覆車千祀故
當貽諸好事豈擬惟傳子孫方復固其緘滕嚴其扃鐫
天下之望豈如是乎僕亡兄芮城嘗典著局大業之末
欲撰隋書俄逢喪亂未及終畢僕竊不自揆思率餘功
收撮漂零尚存數帙兆自開皇之始迄於大業之初咸
亡兄點竄之遺迹也大業之後言事闕然僕雖欲繼成
無可憑採以此尤思見足下之所作也還使請致無再

答馮子華處士書

王績

奉別甫而已十餘年誦采葛之詩增其慨詠夫人生一世忽同過隙合散消息周流不居偶逢其適便可卒歲陶生云富貴非吾願帝鄉不可期又云盛夏五月跣脚北窓下有涼風暫至謂是羲皇上人嗟乎適意爲樂雅會吾意吾河渚間有先人故田十五六頃河水四遶東西趨岸各數百步古人云河濟之濱宜藜況中州之腴乎家兄鑒裁通照知吾縱恣散誕不閑拜揖糠粃禮義錙銖功名亦以俗外相待不拘家務至於鄉族慶弔閨門婚冠寂然不與者已五六歲矣親黨之際皆以山麋

野鹿相畜性嗜琴酒得盡所懷幸甚幸甚近復獨坐河渚結構茅屋并廚廩總十餘間奴婢數人足以應役用天之道分地之利耕耘薦藁黍稷而春秋歲時以酒相續兼多養鳧鴈廣收雞豚黃精白朮枸杞薯蕷朝夕採掇以供服餌床頭素書數帙老莊及易而已過此以往罕嘗或披忽憶弟兄則渡河歸家維舟岸側興盡便返每遇天氣晴朗則於舟中詠大謝亂離趨孤嶼之詩眇然盡陂澤山林之思覺瀛洲方丈森然目前或與舟人漁子方潭並釣俛仰極樂戴星而歸歌詠以會意爲巧不必與夫悠悠閒人相唱和也孤往河濬傍無四隣聞

大聲望烟火便知息身之有地矣近復有人見贈五品
地黃酒方及種薯蒟杷等法用之有妙力省功倍不
能暇修混沌並常行之裴孔明雖是異名教物然風月
之際往往有高人體氣兼特受巧信思若有神自作素
琴一張云其材是嶧陽孤桐也近携以相過安軫五柱
龍唇鳳翮實與常琴不同發音吐韻非常和卽吾家三
兄生於隋末傷世擾亂有道無位作汾亭操蓋孔子龜
山之流也吾嘗親受其調頗爲曲盡近得裴生琴更習
其操洋洋乎覺聲器相得今便留之恨不得使足下爲鍾
期良用眇然吾所居南渚有仲長先生結菴獨處三十

載非其力不食旁無侍者雖患瘖疾不得交語風神肅肅可無俗氣携酒對飲尚有典型先生又作獨遊頌及河渚先生傳開物寄道懸解之作也時取玩讀便復江湖相忘吾往見薛收白牛溪賦韻趣高奇詩義晦遠嗟峨蕭瑟真不可言壯哉邈乎楊班之儔也高人姚義常語吾曰薛生此文不可多得登太行俯滄海高深極矣吾近作河渚獨居賦爲仲長先生所見以爲可與白牛連類今亦寫一本以相示可與清溪諸賢共詳之也亂極則治生途漸亨天災不行年穀豐熟賢人充其朝農夫滿於野吾徒江海之士擊壤鼓腹輸太平之稅耳帝

何力於我哉又知房李諸賢竭力廟廊吾家魏學士亦
申其才公卿勤勤有志於禮樂元首明哲股肱爲良何
慶如之也夫思能獨放江湖之士才堪濟世王者所須
所恨姚義不從薛生已沒使雲羅天網者有所不該以
爲嘆恨耳吾比風痺發動常劣劣不能佳然煙霞山水
性之所適琴瑟酒賦不絕於時時遊人間出入郊郭暮
春三月登於北山松栢羣吟藤蘿翳景意甚樂之箕踞
散髮與鳥獸同羣醒不亂行醉不干物賞洽興窮還歸
河渚蓬室瓮牖彈琴誦書優哉游哉聊以卒歲首夏漸
熱足下何如也願動息多宜黃頰之聚何時暫忘偶因

南風畧示所懷敬願珍厚不一

負笈者傳

王績

昔者文中子講道於白牛之溪弟子捧書北面環堂成
列講罷程生薛生退省於松下語及周易薛收嘆曰不
及伏羲氏乎何詞之多也俄而有負笈者皤皤然委擔
而息曰吾子何嘆也薛生曰嬰何爲者而徵吾嘆負笈
者曰大麗朱者丹附墨者黑蓋累漸而得之也今吾子
所服者道而猶有嘆是六府五藏不能無受也是以問
薛生曰收聞之師易者道之蘊也伏羲氏畫八卦而文
王繫之不逮省久矣以爲文王病也吾是以嘆負笈者

曰文王焉病伏羲氏病甚者也昔者伏羲氏未畫卦也
三才其不立乎四序其不行乎百物其不生乎萬象其
不森乎何勞乎而費畫也自伏羲氏洩道之密漏神之
機分張太和磔裂元氣使天下智詭之道迸出曰我善
言篆而識物情陰陽相磨遠近相取作爲剛柔同異之
說以駭人志於是智者不知而大樸散矣則伏羲氏始
兆亂者也安得羸嘆而嗟文王乎負其筌而行追而問
之居與姓名不答而去文中子聞之曰隱者也

祭關龍逢文

王 績

歲月日謹以清酌之奠敬祭夏忠臣關生之靈曰聖貴

達節賢貴識時興亡有運用捨有期憑河暴虎前哲所
嗤身滅主喪如何勿思我因行役歷於荒祠壯山河之
舊壤歎墳壟之餘基松枯柏悴草密苔滋託深悲於薄
醑魂有靈而饗之

祭處士仲長子光文

王績

歲月日隣人王績謹以魚醴之奠敬祭仲長先生之靈
曰明道若昧進道若退鳥飛知還龍亢必悔嗟嗟夫子
理融其內不伎不求無憎無愛古人有言微妙元通藏
用以密養正以蒙嗟嗟夫子久執厥中不見其始孰知
其終蕩蕩心跡悠然默語周覽人事退居河渚何去何

從誰求誰與聊同聚散亦均寒暑大矣夫子其生若浮
至矣夫子其死若休鄉黨不懼朋友不憂素琴猶在黃
經尚留老來不婚梁鴻難偶筵無饋奠室如箕箒嗟嗟
夫子豈圖其後金玉滿堂道爲之友凡我故人素服臨
旆葛巾從窆桐棺以遷墳不易壙坎不及泉苟無恒化
於何問天道性旣喪仁義蠶起祭非古也禮之爲始吾
從其俗敢告夫子清樽薄奠神其歆止

文中子傳

杜淹

文中子王氏諱通字仲淹其先漢徵君霸潔身不仕十
八代祖殷雲中太守家於祁以春秋周易訓鄉里爲于

孫資十四代祖述克播前烈著春秋義統公府辟不就
九代祖寓寓生罕罕生秀皆以文學顯秀生二子長曰
元謨次曰元則元謨以將畧陞元則以儒術進元則字
彥法卽文中子六代祖也仕宋歷大僕國子博士究道
德考經籍江左號王先生生江州府君煥煥生虬
虬始北事魏太和中爲并州刺史曰晉陽穆公虬生同
州刺史彥曰同州府君彥生濟州刺史一曰安康獻公
安康獻公生銅川府君諱隆字伯高文中子之父也傳
先生之業教授門人千餘隋開皇初以國子博士待詔
雲龍門承詔著興衰要論七篇每奏帝稱善爲昌樂令

遷猗氏銅川所治著稱職滿退歸遂不仕開皇四年文中子始生銅川府君筮之遇坤之師獻兆於安康獻公獻公曰地二化爲天一上德而居下位雖有君德非其時乎是子必能通天下之志遂名之曰通開皇九年江東平銅川府君嘆曰王道無叙天下何爲而一乎文中子侍側十歲矣有憂色曰通聞古之爲邦有長久之策故夏殷以下數百年四海常一統也後之爲邦行苟且之政故魏晉以下數百年九州無定主也夫子蓋憂皇綱不振而天下將亂乎銅川府君異之曰其然乎遂告以元經之事文中子再拜受之學於四方不解衣者六

歲仁壽三年文中子冠矣慨然有濟蒼生之心西遊長
安見隋文帝帝坐太極殿召見因奏太平策十有二策
尊王道推霸畧稽今驗古恢恢乎運天下於指掌矣帝
下其議於公卿公卿不悅文中子知謀之不用也作東
征之歌而歸曰我思國家兮遠遊京畿忽逢帝王兮降
禮布衣遂懷古人之心兮將興太平之基時異事變兮
志乖願違吁嗟道之不行兮垂翅東歸皇之不斷兮勞
身西飛帝聞而再徵之不至大業元年復徵不至辭以
疾謂所親曰我周人也家於祁永嘉之亂蓋遷焉高祖
穆公有大功於生人天子錫之地始家於河汾故有墳